

Newspaper	BERITA HARIAN
Date	21 MAY 2016

Malaysia minta Vietnam ekstradisi perampas kapal

BH - 21/5/2016

Malaysia meminta Vietnam mengekstradisi lapan orang yang terbabit merampas kapal tangki MT Orkim Harmony ke Malaysia untuk membolehkan mereka didakwa.

Datuk Seri Najib Razak berkata, beliau menyampaikan permintaan itu kepada rakan sejawatnya, Nguyen Xuan Phuc ketika mengadakan pertemuan di luar Sidang Kemuncak Peringatan ASEAN-Russia semalam.

“Saya sudah memaklumkan permintaan kita itu kepada beliau dan

Nguyen berjanji akan memberi perhatian sewajarnya terhadap perkara itu,” katanya kepada wartawan Malaysia.

Pertemuan pertama

Ini adalah pertemuan pertama di antara kedua-dua pemimpin berkenaan sejak Nguyen dilantik sebagai Perdana Menteri Vietnam yang kelapan pada 7 April lalu.

Yang turut hadir, Ketua Setiausaha Kementerian Luar, Datuk Othman Hashim; Duta Malaysia ke Russia, Datuk Hayati Ismail dan

pegawai kanan kementerian.

Perdana Menteri berkata, dalam pertemuan itu beliau juga meminta Vietnam memberi pertimbangan sewajarnya untuk mengurangkan kerenah birokrasi bagi membolehkan pelabur Malaysia menjalankan perniagaan di sana.

Katanya, Nguyen pula meminta supaya Malaysia mengkaji semula perjanjian persefahaman (MOU) sebelum ini sekali gus membuka semula pengambilan pekerja dari Vietnam.

Info

Rampasan kapal Orkim Harmony

→ **MT Orkim Harmony** membawa 6,000 tan petrol bernilai RM21 juta dan 22 anak kapal 16 rakyat Malaysia; lima Indonesia dan seorang Myanmar terputus komunikasi dengan pangkalan pada 8.57 malam di Timur Tanjung Sedili, Kota Tinggi di Johor pada 11 Jun 2015.

→ **Pada 18 Jun 2015**, kapal itu dikesan dirampas dan ditukar nama asalnya 'Orkim Harmony'

kepada 'Kim Harmon'.

→ **Semua 22 anak kapal MT Orkim Harmony** dibebaskan pada jam 2.30 pagi 20 Jun 2015 dan kapal itu tiba di Pelabuhan Kuantan

→ **8 lelaki Indonesia** yang dipercayai perampas kapal itu ditahan berkuasa Vietnam berhampiran Pulau Tho Chu, selatan Vietnam ketika cuba meloloskan diri daripada pemburuan.